

13 DEC 1998
Mahathir-Pemimpin
PILIH PEMIMPIN KERANA KUALITI, KATA DR MAHATHIR

KUALA LUMPUR, 13 Dis (Bernama) -- Datuk Seri Dr Mahathir Mohamad berkata pemilihan seseorang pemimpin hendaklah diasaskan kepada perwatakan calon, kebolehannya dan kualiti-kualiti lain yang menyesaikannya sebagai pemimpin.

Perdana Menteri berkata soal kesetiaan kepadanya sebagai individu atau ketua sesuatu kumpulan tidak harus ada dan mempengaruhi pemilihan.

"Jika pemilihan tidak diasaskan kepada kesetiaan peribadi atau kumpulan maka selepas pemimpin dipilih barisan parti dapat dirapatkan semula," katanya pada perhimpunan agung khas Umno di Pusat Dagangan Dunia Putra (PWTC) hari ini.

Perhimpunan agung khas diadakan bagi meminda perlembagaan parti yang antara lain bertujuan membanteras politik wang dan memantapkan struktur parti menjelang pemilihan Umno pada Jun tahun depan.

Dr Mahathir, yang juga Presiden Umno, seterusnya mengingatkan bahawa seseorang pemimpin yang sudah dipilih mesti diberi sokongan padu kerana itu sahajalah yang boleh menentukan kewibawaan dirinya dan organisasi yang dipimpinya.

Malah, kata Perdana Menteri, selagi ia menjadi pemimpin selama itulah ia perlu disokong.

"Kesetiaan dan ketaatan kepadanya bukanlah kerana tubuh badannya, kerana peribadinya. Kesetiaan kepadanya adalah kerana jawatannya, jawatan yang disandang olehnya mengikut perlembagaan dan melalui pemilihan parti.

"Jika ia gagal mengekalkan kepercayaan parti kepadanya, maka ia boleh digugur oleh parti juga mengikut perlembagaan parti," katanya.

Dr Mahathir juga mengingatkan tentang bahayanya amalan kronisme dan berpuak di dalam parti.

"Kronisme dan berpuak-puak tidak patut ada dalam parti. Jika diamalkan lambat laun parti akan berpecah dan menjadi lemah," katanya.

Katanya kemenangan bagi mana-mana kumpulan akan menyebabkan kumpulan yang kalah tidak menyokong, dan dengan itu pemenang hanya mendapat sokongan daripada sebahagian sahaja parti lalu ia menjadi lemah.

Beliau berkata budaya demokrasi yang sebenar berkehendakkan pemilihan dibuat secara persahabatan.

Katanya pemilihan antara parti-parti semasa pilihan raya adalah berlainan daripada pemilihan dalam parti.

"Dalam parti yang perlu diutamakan ialah kewibawaan parti, keberkesanan parti. Kemenangan menjadi pemimpin tidak bermakna jika ia menyebabkan parti berkecai, menjadi lemah, gagal memenangi pilihan raya dan membentuk kerajaan," kata beliau.

Dr Mahathir berkata jika pemilihan pemimpin tidak diasaskan kepada kesetiaan peribadi, maka tidak akan wujud permusuhan oleh pihak yang kalah terhadap pemimpin yang dipilih atau penyokong-penyokongnya.

"Sebaliknya semua ahli parti merapatkan barisan dan memberi sokongan padu kepada pemimpin yang dipilih. Dengan itu, parti akan terus kuat dan mampu menangani masalah parti dan masalah kerajaan dan negara," kata beliau.

Dr Mahathir berkata anggota Umno hendaklah membentuk budaya yang mengutamakan kepentingan parti dan bukan kepentingan calon tertentu.

"Mungkin ada yang berpendapat bahawa calon mereka begitu baik sehingga jika ianya gagal maka akan gagallah parti.

"Mungkin benar. Tetapi jika dalam usaha untuk menjayakan calon

berkenaan, parti dikorbankan maka ketaksuban kepada calon tidak mendatangkan apa-apa hasil.

"Yang penting ialah kita tidak keterlaluan dalam usaha menjayakan calon kita, dan jika ia gagal maka hendaklah kita sanggup menerima calon yang dipilih oleh majoriti," katanya.

Beliau berkata selepas pemilihan dibuat maka barisan mesti dirapatkan semula sehingga tidak ada renggang yang membenar musuh mencelah.

Katanya ketegangan semasa pemilihan hendaklah dilupakan dan tumpuan diberi kepada menjayakan matlamat parti.

"Ingatlah dalam politik tidak ada kawan yang kekal, tidak ada musuh yang kekal," kata Dr Mahathir.

-- BERNAMA

MOK AKD